



En sa chattads bain a Pardiala: Walter Burkhardt, president «BSV», Walter Wieland, schef Tir champester e Hans Stucki, president District da tir Surselva (da san.).

# Ospitants generus a Pardiala

Tir champester 2016

DA GION NUTEGN STGIER / ANR

■ **La supranza da l'Uniu chantunala da tir è stada sin visita en Surselva. L'entupada è stada en il segn d'amizicia e da buns discurs. Il Tir champester 2016 è stà en il Grischun in success cun s'augmentar il dumber da participants. Naziunal èn schizunt 5000 persunas dapli sa participadas a l'occurrèza da tir. Il Tir champester è anc adina popular e quai en il Grischun sco er en l'entira Svizra. Crudà an egl è quest onn cunzunt er che daplis giuven èn sa participads al pli grond tir dal mund e quai er en noss chantun. Sajettà sin la distanza da 300 m han en il Grischun 2635 dels e cun la pistola èn quai 1035 tiradurs. Cun in total da 3670 participants è an cumparaziun cun l'onn 2015 l'interess per il Tir champester er en il Grischun stà pli grond. 51 triadurs dapli han tratg la davosa fin d'emna ils 18 culps dal tir tradiziunal. Er naziunal è il dumber s'augmentà e quai gist per 5000 participants sin in total da 130 000 tiradurs e tiraduras.**

**En Svizra 28 maximus sin la distanza da 300 m**

En noss chantun han cun *Urs Brazzerol* da Farrera e *Robert Studer* da Castrisch,

suentur dus onns senza be in resultat maximal, schizunt dus tiradurs sajettà la cifra magica da 72 puncts sin la distanza da 300 m cun l'arma da militar. En Svizra è quel resultat maximal reussì a 28 tiradurs da 13 differents chantuns. Cun la pistola n'èsi betg gartegià ad in tiradur grischun da far il maximum da 180 puncts. Naziunal han gist 14 participants fatg quel coup.

En il Grischun mancà be per in punct da far ils 72 puncts han tschintg tiradurs ed ina tiradura. Quai èn: *Roman Egger*, *Ruschein*, *Isidor Jäger*, *Castasegna*, *Andrea Stiffler*, *Tavau*, *Werner Bebi*, *Jenaz*, *Tarcisi Cadruvi*, *Ruschein* e *Mirjam Hartmann*, *Aschera*.

**68,50% han fatg il cranz sin la distanza lunga**

Sin la distanza da 25 m, cun la pistola, n'ha nagin participant fatg il maximum da 180 puncts. Gudagnà la concorrenza cun 178 puncts e quai pervia da la vegliadetgna ha *Walter Rissi*, *St. Antönien*. Cun el han anc ils tschintg ulteriurs tiradurs tratg medem blers puncts: *Enrico Cola*, *Cunter*, *Walter Bass*, *Trun*, *Elmar Fallet*, *Müstair*, *Rico Duff*, *Trun* e *Roman Clavadetscher*, *Sta. Maria*. Sin la distanza da 300 m han 68,50% dals participants fatg il cranz e cun la pistola èn quai 52%.

*Walter Wieland*, il schef dal Tir champester da l'Uniu da tir grischuna, è stà cuntent cun l'occurrèza 2016, è però da l'opiniun che las uniu da tir hajan da far en l'avegnir considerablmain dapli reclama per il tir cun ina tradiziun da passa 120 onns.

**Plaschair da la visita**

Dapi onns èsi tradiziun che dal Tir champester van ils commembers da la supranza da la federaziun che unescha ils tiradurs grischuns en in dals nov districts da tir sin visita. Il viadi da quest onn ha manà *Walter Burkhardt*, il president dal «BSV» e ses amis da la supranza, a Vuorz en il stan da sajettar Pardiala. Ils tiradurs sursilvans èn stads ospitants generus, els èn sa mussads loschs da la visita e plaschair han els er gi che intgins dals giasts han tratg lur program dal Tir champester a Pardiala. *Walter Wieland* ha ditg che per il «BSV» saja da gronda valur da sentir la basa, sa mussar solidaric ed avair ureglia per vegl e giuven. Il contact tar ils funcziunaris e voluntaris che prestan buna lavur durant il Tir champester saja da tgirar fitg. Tut èn tut è la delegaziun da la Federaziun dals tiradurs grischuns sa chattada bain en il ravugl dals tiradurs da la Surselva.



In tiradur passiuà è er Arno Sgier d'Andiast.



Michael ed Esther Cadruvi cun lur matta Leila.



Schef da la distanza curta tar ils tiradurs sursilvans è Enrico Veraguth.



In dals blers giuven che han tratg il tir tradiziunal è Dominic Candinas da Rueun.



Anna Marugg, schefa dal tir da pistola tar ils «BSV», cun colonel Jöri Kaufmann, cumandant cirquital.



Viva di e notg per il tir: Ignaz Caduff.